

Harga minyak tidak jejas teruk ekonomi negara: PM

ms 3 BA 19/05/04

Oleh Shamshul Azree Samshir

PUTRAJAYA: Kenaikan harga minyak di pasaran dunia dijangka tidak memberi kesan terlalu buruk kepada pertumbuhan ekonomi negara, kata Datuk Seri Abdullah Ahmad Badawi.

Perdana Menteri berkata, sebarang kenaikan dan kesan peningkatan bahan bakar itu dapat ditangani berikutan asas ekonomi negara masih kukuh serta kemampuan dalaman untuk terus berkembang menghadapi ketidakpastian.

“Pada waktu ini, Alhamdulillah,

satu perkara yang kita tahu ialah asas ekonomi kita kuat dan teguh,” katanya pada sidang akhbar selepas menghadiri perhimpunan bulanan Kementerian Keselamatan Dalam Negeri di sini, petang semalam.

Turut hadir Menteri Hal Ehwal Dalam Negeri, Datuk Azmi Khalid dan Timbalan Menteri Keselamatan Dalam Negeri, Datuk Noh Omar.

Pada majlis itu, Abdullah yang juga Menteri Kewangan menyampaikan sumbangan RM55,270 hasil kutipan derma kakitangan jabatan dan agensi kementerian itu kepada Presiden Mercy Malaysia, Datuk Dr Jemilah Mahmood.

Abdullah diminta mengulas sama ada kerajaan akan menilai semula Keluaran Dalam Negara Kasar (KDNG) negara berikutan kenaikan harga minyak mentah yang mencapai harga AS\$41.55 satu tong, tahap tertinggi dalam tempoh 21 tahun, akan mempengaruhi kadar inflasi, sekali gus menjejaskan unjuran pertumbuhan awal kerajaan.

Kelmarin, bursa saham di seluruh dunia termasuk Asia mencatatkan kejatuhan besar berikutan kebimbangan harga minyak mentah di pasaran dunia terus meningkat.

Kejatuhan pasaran saham di seluruh dunia itu termasuk di Malaysia

Isnin lalu juga disebabkan ketidakpastian mengenai kenaikan kadar faedah di Amerika dan China, dua rakan perdagangan utama negara.

Sebagai langkah berhati-hati, Abdullah berkata, kerajaan terus memantau keadaan dan akan mengumumkan langkah strategik bagi mengatasi masalah itu.

Katanya, Majlis Tindakan Ekonomi Negara (MTEN) diminta memperincikan isu itu dan mengenal pasti langkah khusus yang perlu diambil supaya kesan kenaikan harga minyak yang mungkin dirasakan tidak terlalu buruk.

“Mudah-mudahan, kalau berlaku

apapun, kita dapatlah membuat tindakan yang dapat mengawal supaya kesan buruk itu... tidaklah terlalu buruk terhadap ekonomi kita,” katanya.

Abdullah berkata, pemerhatian sedang dilakukan bagi memastikan aliran tertentu dalam ekonomi dunia serta kesan buruk yang mungkin dibawa untuk jangka masa panjang.

“Dalam masa terdekat, mungkin kita dapat menahan kesan negatif, Insya-Allah. Kita perlu pastikan dengan teliti supaya tindakan yang hendak dilaksanakan menepati situasi dihadapi,” katanya.